

en Egypte, & consacrant le bœuf *Apis*, auoit le Diadème sur son chef (n'estant toutesfois encore Empereur & *Auguste*) selon la coustume de l'ancienne religion. Ce que toutesfois fut autrement pris & interpreté, à sçauoir, qu'il affectoit de regner, encore que son pere fust viuant & regnant: pource que, ainsi qu'il a esté dit, le Diadème estoit indice & enseigne particuliere des Rois. Voire la couronne & chapeau de laurier (qui estoit vsurpé & porté non seulement des *Augustes* & *Cesars*, ains des *Senateurs* & autres, mesme hors le triomphe) n'eust peu se lier avec ce ruben blanc, sans donner soupçon de regne affecté: comme appert par plusieurs lieux de bons autheurs, & singulierement par *Suetone*. Combien que ie n'ignore point se trouuer des medalles, & dudit *Iules Cesar*, & de *Marc Antoine*, ayans la couronne de laurier ainsi entrelacee de ce tocquement, que nous disons estre Diadème: mais telles medalles furent faites par adulation & flatterie, & principalement en la Grece & hors l'Italie. Comme aussi apres la mort dudit *Iules Cesar*, on enrichit ses medalles avec la couronne à rais ou rayons, dite en Latin *Radiata*, qui estoit couronne propre aux dieux: de laquelle toutesfois, avec le Diadème, tous les Empereurs depuis *Iules Cesar*, ont vsé, comme se voit en leurs medalles pour le iourdhy. Encore que *Sextus Aurelius Victor* ait escrit, l'Empereur *Aurelian*, contre la coustume Romaine, auoir porté le Diadème en sa teste, & force pierres precieuses & or en tous ses habillemens, le premier de tous les Empereurs Romains. Or pour parfournir nostre propos, quelquefois estoit ceste bande & Diadème, haute & large, chargée de pierreries, principalement aux bords & à l'environ: quelquefois enrichie d'ouurage Phrygien, à belles fleurs, petits oyseaux, & choses semblables, elabourees par dessus: comme *Petrus Valerianus* en ses Hieroglyphiques dit cela se voir en la medalle de *Tigranes*, Roy d'Armenie. Cela se voit aussi en quelques reuers de medalles de *Marc Antoine*, representans la Royne *Cleopatra* sa femme, ornee de tel Diadème que nous disons. Je diray encore d'abondant ce mot, que le *Turbant* ou *Turban* que porte au iourdhy le grand Turc, semble auoir esté pris de ce Diadème, an-

En la vie de
Iules Cesar.